



STINAPA TA INFORMA

PLANTANAN DI PURIFIKÁ AWA DEN LAC

Bo no ta skucha nada di dje pero enbèrdat den bahia di Lac tin un aktivitat di otro mundu! E lugá ei ta yená ku míles di planta di purifiká awa ku ta hasi nan trabou den un silensio apsoluto. Normalmente nos konosé nan komo 'Pal'i Mangel' (Mangrove) i nan ta perkurá ku hopi ingrediente i alimento ta ser filtrá for di e awa. Tin kuater tipo di pal'i mangel ta eksistí den i rondó di bahia di Lac. Kada un ku su propio sitio. E pal'i mangel kòrá ta haña su nòmber dor di su kaska kòrá. E tipo aki ta krese mas tantu den e partinan serka di laman. Ku su raisnan di aire úniko nan ta gara hopi sobrá di mata i sleim. Di e manera aki na un manera natural ta krea tera. I esaki ta protehá Boneiru di e forsa di laman. Aunke e olanan brutu ta bati hopi riba e pal'i mangel kòrá, e tera meimei di su raisnan ta keda kaminda e ta. Mas aden bo ta haña e pal'i mangel pretu. Esaki ta masha bon resistente kontra awa hopi salu. Den e tera kaminda e pal'i mangel pretu ta krese kasi no tin oksígeno. Danki na e raisnan ku ta sali manera un snòrkel for di bou di awa e por hala rosea tòg. Kompletamente riba tera seku bo ta haña e pal'i mangel blanku. Esaki ta haña e nòmber aki pa motibu di su flornan blanku. Al final tin e pal'i mangel shinishi, ku tambe ta preferá biba den tera seku. E simianan di e pal'i mangel kòrá i pretu ta kai for di e mata maternal den awa òf direktamente riba tera. Ora ku nan yega na un lugá adekuá nan ta sprùit i krese bira un mata propio. E simianan di e dos tiponan aki ta krese masha lihé den nan promé aña. Un karakteristiká di tur pal'i mangel ta ku nan blachi ta hopi diki. E fenómeno aki bo ta enkontrá tambe serka otro matanan ku ta biba bou di kondishonnan seku, manera desierto. E lag di waks riba kada blachi ta prevení ku muchu awa ta evaporá, awa ku ta esensial p'e pal'i mangel sobreviví den e ambiente salu aki. Fuera di nan importansha pa purifikashon di awa i ganamentu di tera, e palunan di mangel tin un otro funshon importante tambe. Nan ta manera un hotèl pa tur sorto di animal. Meimei di nan ramanan, para ta haña un lugá di drumi i brui trankil. Riba e pisonan mas abou di e hotèl aki, ku ta bou di awa, hopi otro mata i piská ta biba bon protehá. Tur e espesienan aki ta biba den harmonia total ku otro i ku naturalesa! Skirbí pa Marcel Carpay, tradusí pa Marcel Nahr.

Pa mas informashon i reakshon: STINAPA, telefon 717 - 8444, info@stinapa.org

NOS TA BIBA DI NATURELSA



Traha huntu na un desaroyo duradero pa Boneiru